

DOMINGO 2 PASCUA Ciclo B

PRIMEIRA Feit 4, 32-35

Un só corazón e unha soa alma

PROCLAMACIÓN DA PALABRA RECOLLIDA NO LIBRO DOS FEITOS DOS APÓSTOLOS

A comunidade dos crentes tiña un só corazón e unha soa alma, e ninguén consideraba coma seu o que posuía, senón que todas as cousas eran comúns. Os apóstolos, con gran poder, daban testemuño da resurrección do Señor Xesús, e todos eles eran ben considerados. Non había entre eles ningún necesitado, porque todos os que tiñan bens ou casas vendíanos, levaban os cartos e depositábanos aos pés dos apóstolos, que repartían a cadaquén segundo precisaba.

SALMO RESP. Sal 117, 2-4. 16ab-18. 22-24

***R/ (1): Cantádelle ao Señor, porque é bo, porque a súa misericordia dura por sempre
Ou: Aleluia***

Que o diga a casa de Israel:
o seu amor é eterno;
que o diga a casa de Aharón:
o seu amor é eterno;
que o digan os que temen ao Señor:
o seu amor é eterno.

a dereita do Señor é poderosa,
a dereita do Señor é valente.
Non hei morrer, vivirei
e cantarei os feitos do Señor.
O Señor, certo, castígame,
mais non me entrega á morte.

A pedra que desbotaron os canteiros
convértese en pedra angular.
Isto é cousa do Señor,
admirable feito á nosa vista.
Este é o día en que obra o Señor:
relouquemos e alegrémonos nel.

SEGUNDA 1 Xn 5, 1-6
Canto nace de Deus vence o mundo

**PROCLAMACIÓN DA PALABRA RECOLLIDA
NA PRIMEIRA CARTA DE SAN XOÁN**

Benqueridos irmáns e irmás:

Todos cantos cren que Xesús é o Mesías, naceron de Deus; e quen ama ao que enxendra, ama tamén a quen aquel enxendrou. Sabemos que amamos os fillos de Deus, se amamos a Deus e cumprimos cos seus mandamentos.

Porque o amor a Deus consiste en cumprir cos seus mandamentos. Os mandamentos de Deus non son pesados, porque nacer de Deus permítenos vencer o mundo. E esta é a vitoria que derrota o mundo: a nosa fe. Porque, quen é o que derrota o mundo, senón o que cre que Xesús é o Fillo de Deus?

O que veu con auga e sangue, foi el, Xesús Cristo; non veu con auga só, senón con auga e con sangue. E o Espírito é quen dá testemuño, xa que o Espírito é a Verdade.

ALELUIA Xn 20, 29

Porque me viches, Tomás, tes fe, di o Señor; ditosos quen non viron e creron

DOMINGO 2 PASCUA Ciclo B

EVANXEO Xn 20, 19-31

Pasados oito días, veu Xesús

PROCLAMACIÓN DO SANTO EVANXEO SEGUNDO XOÁN

Naquel día, o primeiro da semana, ao serán, estando pechadas as portas onde estaban os discípulos, por medo dos xudeus, chegou Xesús, e, poñéndose no medio, díxolles:

- Paz convosco.

Dito isto, mostroulles as mans e mailo costado. Os discípulos alegráronse, vendo o Señor. El díxolles outra vez:

- Paz convosco: coma o Pai me mandou a min, tamén eu vos mando a vós.

E dito isto alentou sobre eles, e díxolles:

- Recibide o Espírito Santo: a quen lles perdoedes os pecados, quedaránlles perdoados; a quen llelos reteñades, quedaránlles retidos.

Pero Tomé, un dos Doce, o chamado Xémeigo, non estaba con eles cando chegou Xesús. Díciánlle entón os outros discípulos:

- Vimos o Señor.

Pero el contestoulles:

- Como non vexa nas súas mans as furas dos cravos e non meta nelas o meu dedo; como non meta a miña man no seu costado, non creerei.

Oito días despois estaban outra vez dentro os discípulos, e Tomé con eles. Chegou Xesús, estando pechadas as portas, e poñéndose no medio, dixo:

- Paz convosco.

Despois díxolle a Tomé:

- Trae aquí o teu dedo e mira as miñas mans; trae a túa man e métea no meu costado. Non sexas incrédulo, senón home de fe.

Tomé respondeulle:

- ¡Meu Señor e meu Deus!

Xesús díxolle:

- Tes fe porque me viches? ¡Benia os que creron sen veren!

Moitos outros signos fixo Xesús diante dos seus discípulos, que non se escribiron neste libro. Estes escribíronse para que creades que Xesús é o Mesías, o Fillo de Deus e, crendo, teñades vida nel.